

Den 42 aña, De Trupialen a trece alegría den hopi skina di Aruba

Xa 1953 A r u b a tabata un isla simpely keto. No tabatin television y mucha homber y mucha muherman tabata bai skolnan separá.

Baimento di misa, cine y wak wega di futbol tabata e actividadnan mas importante di siman. Den e tempo aki talento musical, e curiosidad cultural, e amor pa mucha y e curashi pa haci cosnan nobo, a pone un homber lanta un grupo di canto di mucha homber cu a haya e nomber 'De Trupialen'. E homber aki tabata Rien Preyde. Pa nos Frere Alexius. Pa ser exacto 'De Trupialen' a ser fundá dia 13 di Januari 1953, pues e tin 42 aña di existencia.

Entre su amigonan cu a curashé for di un principio tin Frere Caspar, Frere Paulino, Frere Antonius y otro frerenan, Padú Lampe, Hubert Booi y Rufo Wever (q.e.p.d.).

Despues cu Frere Alexius a

experimentá un poco tempo, poco-poco e grupo hubenil a bin descubri nan mes direccion, esta un grupo cultural cu a dedicá nan mes pa preservá y na mesun momento promové y divulgá un cultura Arubano.

Riba terreno di canto, esaki tabata nificá, busca of mihó bisá saca tur loke tabata casi lubidá caba, poné riba terra, esta cancionnan popular Antiyano/Arubano.

E promé idea tabata pa e grupo canta na misa hunto cu e Koor di e Frerenan, pero e acogida di e grupo tabata asina grandi, cu poco tempo despues a cuminsá pidi e grupo pa canta na otro ceremonianan oficial. E interes pa 'De trupialen' tabata asina grandi cu a dicidí pa amplia su repertorio.

E promé cancionnan cu nan a cuminsá cuné a wordo sacá for di 'Land en Volkenkunde van Curacao'.

Pero esakinan tabata asina poco cu no tabata mucho cos di gaba. E coleccion di

cancionnan 'Ban canta' tambe a yuda nan cu algun cancion, pero no suficiente cu nos por a topa cu algo típico di e pueblo.

Puntra aki, puntra aya, riba un bon dia Frere Alexius a yega te na porta di hospital, Dios gracias no pa malesa, akinan felizmente el a bin topa cu Pascuala Maduro, kende tabata disponé di un coleccion basta regular, di net e cancionnan cu Frere tabata buscando, cancionnan gracioso, bunita y yen di pep.

Pascuala a scirbi nan, tin biaha cantanan riba tape-recorder y asina por a yega di scirbi nan nota musical.

Lennie Coronel, conocido músico cu lamentablemente a bandoná tur hende asina tempran, a yuda e grupo hopi den scirbimento di nota pa e cancionnan.

De Trupialen a dicidí di haci otro actividadnan. A cuminsá siña e muchanan toca instrumentonan musical y tambe hunga comedia. Poco

tempo despues e coro tabatin su propio banda musical. Tambe a cuminsá siña e muchanan obranan di teatro y siñan hunga 'Poppenkast', cu a bira masha famoso tanto pa mucha y hende grandi.

E canti di e grupo a hala mas atencion ... pero tambe discusion. Pasobra Frere Alexius a triba den e añanan cincuenta pa canta cancionnan na Papiamento. Den e tempo cu Hulandes tabata e idioma cu tabata dominá. E promé biaha cu Frere a tribi di canta cancionnan na Papiamento den público tabata na ocasion di Dia di La Reina. Frere a haya hopi critica ... pero tambe a haya hopi elogio. Frere Alexius su conviccion cu un pueblo mester papia su propio idioma pa e por desarroyá su mes, a poné sigui canta na Papiamento di su grupo. E promé disco cu 'De Trupialen' a graba tabata e composicion di Rufo Wever y Padú Lampe (Padú del Caribe): 'Aruba Dushi Tera', cancion cu awe ta nos himno nacional.

De Trupialen tabata consisti di mucha homber só, y ta despues, na fin di añanan cincuenta cu mucha muherman a incorporá nan mes den e grupo. Pero e pensamiento di un grupo mixto den e tempo ey a haci cu Obispo a dicidí cu esey no tabata por y e Coro a bolbe bira un Coro di Mucha homber só.

Ta te den añanan setenta a bolbe permiti mucha muherman forma parti di e grupo aki atrobe y te awe esey ta e caso. Y awor t'asina cu tin mas mucha muher cu mucha homber den e grupo.

Den e cuarenta e dos añanan di e grupo, nan a haci hopi curazon den tur skina di Aruba contento cu nan canto, música y comedia. Pasando den tur barriero aki na Aruba, De Trupialen tabata trece nan alegría, hopi biaha riba terreno di skol of bao di 'overdekte speelplaats'.

Entre e comediantan famoso cu nan a yega di presentá tin 'Scapin'; 'Buchi'; y 'Tension Berom'. Tambe tin e comediantan musical manera 'Hans & Grietje'; 'E corona di

e Rey' y e famoso 'E perla di Caribe'.

Den presentacion di 'E perla di Caribe', sr. Hubert Booi tambe a duna nan algun texto y melodíanan, entre nan e famoso 'ora Ubao'. E conocido Padú del Caribe hunto cu Rufo Wever, pianistanan destacá di e isla, tambe a duna nan cooperacion. Riba palabranan di sr. Booi y Ellis Juliana nan a componé un trozo di cancionnan hubenil, cual te ainda por wordo scuchá.

Algun persona cu a yuda nan ta: Toti Arends; sr. y sra. Hasselaar. E promé banda musical di 'De Trupialen' cu a cosechá éxito hasta den exterior tabata 'Los Elegantes. Te awe e ta wordo reconocí como e origen di bandanan moderno na Aruba'. Despues di dje a sigui 'De Truplets' y 'Purple Magic'.

Y e grupo a sigui cu tempo. Na final di añanan '60 e songfestivalnan a cuminsá bin hopi na moda. Cada grupo tabata organizá nan propio songfestival.

Pa e muchanan cu a lanta den club di De Trupialen, e no tabata solamente un coro of banda musical. E tabata un centro di recreacion, un lugar pa topa cu amigonan, un lugar pa siña cosnan cu bo no por a siña otro caminda. Hopi a siña guia un reunion, siña tuma decisionnan na un manera ordená y responsabel. Siña kiko ta ser puntual, algo cu a bai perdí den comunidad.

Hopi a siña hiba discurso den público y a siña organizá actividadnan. Un cantidad grandi di hende den comunidad awe a haya e oportunidad di desarroyá nan talentonan diverso den e club aki.

E directiva actual ta consisti di e siguiente personanan: Jossy Tromp (Presidente); Emile Herde (Vice Presidente); Nicó Luydens (Secretario); Nelson Petronia (2do secretario); Bill Tromp (Tesorero); Irving Jacobs (2do tesoroero) y comisaronan ta: Lem Pietersz; Mario Tromp y Patrick Paris. □